

L'ome èt sès deûs coméres.

d'après Jean de la Fontaine.

On-ome ètur deûs-âdjès n'èsteut nin à l' dicauce
Dispû qu' tos sès soçons l' traîtin.n' di vî tchènu.
On dirè qu'on s' fout d' ça, mins tot l' minme, s'on-z-è cause,
C'èst qu'i candjenut d' coleûr fait-à fait qu'i crèchenut.
Mins ça vout dire ossi qui l' tîmps passe, èt l' mâriadje,
Il î faureut sondjî si c'èst po l' fé on djoû ;
Sès botes sont plin.nes di foûre ? i-gn-a yeû d's-èritadjes ! ?
Si feume ? Èle sèrè sûre d'èsse à yute minme s'i ploût.
Totes lès coméres do cwin s' fyin.n' à l'idéye dèl chance
Qui s' présinteut d'avant zèles, èt qu'on n'î tûzeut nin ;
Gn-a jamais yeû dandjî d'aprinde à fé lès cwanses :
Dispû qu'èle sont bauchèles, èle sûvenut lès gamins.
Noste ome n'a qu'à tchwèsi èt prinde li tîmps d' rêlire :
Au mitan do moncia, deûs veuves qu'ont do mèstî
Lî ont tapé dins l'ouy ! I sèt bin qu' gn-a rin d' pîre
Qui d' si r'trover mièrseû, malèrseûs, aflachî.
One dès deûs, li pus vîye, li pwarteut su s' visadje,
Mins s'on vout d' l'èspéryince, c'èst l' pris qu'i faut payî ;
Lès-ans ont spaurgnî l'ôte, mins èlle èst pus sauvadje :
Po gagnî l' keûr di l'ome, èlle èst prête à trichî.
On n' saureut dire douvint, èle roufèlenut su s' tièsse :
One qui plonke su lès gris, l'ôte lès nwârs qu'il a co,
Èt lès rauyî à fait, come s'èle sèrin.n' à l' tchèsse,
Come po l' vlu rabèli. Li, i n' pète nin on mot !
Li lèd'mwin au matin, i s'a r'trové tot paf
En potchant foû di s' lét èt r'waîti dins l' murwè :
« Li prumêre qui vint co, djè lî fou one bèrlafe :
Èlle aurè stî payîye, mès tch'vias è faîyenu fwè !
Tot vos mètant èchone, m'amôdurer èt m' tonde,
Cès bèlès manôûches là m'auront sièrvu d' lèçon :
Dj'a gagnî d' pus qu' vos-ôtes, dji comprind qui ç' qui compte,
C'èst qu'en m' lèyant miner, dji vike à vosse façon.
Mèrci à totes lès deûs, vos m'avez fait veûy clér !
Vos ploz bin fé one crwès su l' mâriadje èt lès sous.
Putôt qu' dè l's-èpîler, fioz vos à vosse misère :
“ Qui l' feume qui rate si côp tire si plan come èle pout ! “

Albert Delvaux Fèvri 2013.

Awè do foûr dins sès botes : être nanti.

Fé lès cwanses : simuler.

Roufler : se précipiter.